

'Lo bay enfoca riba mayor divorcia tambe'

Promocion nobo pa lanta yiu mas consciente

ORANJESTAD - Tienda di Educacion a lansa tres pelicula chikito, must-rando diferente situacion unda mayor por acudi na e instancia pa haya ayudo y siña con pa lanta nan yiu (-nan) miho.

E lansamento a tuma luga na Paseo Herencia den presen- cia di un gran cantidad di persona trahando den ramo social y tambe di Michelle Winklaar, como minister di Famia. Por mira e propa- ganda aki na cinema caba y riba Youtube. Otro siman lo cuminsa transmiti nan riba Telearuba. E productor di e peliculan ta Switch Foun- dation, cu tin un nomber estableci pa produccion di film, documentario riba problemanan social.

E meta tras di e promocion nobo ta pa yuda mayor lan- ta nan yiu mas consciente. E tres situacionnan filma ta base riba problemanan conoci cerca e Tienda. Ta problemanan cu hopi mayor na Aruba a/ta experencia. E prome promocion ta conta e storia di un mama soltera, trahando y obviamente cansa pa haci tur cos su so, inclui lanta su dos yiu cu ta bringa constantemente cu otro. E otro ta visualisa e momento cu un mama ta haya droga den e carson di su yiu muhe ora di laba paña. E mama ta cuminsa grita su yiu y e situacion ta escala. E di tres pelicula ta muestra un tata cu kier duna su yiu homber educacion sexual: "Bo ta cor- da ora nos a bay dierentuin, y e ooievaar..." E yiu ta pensa cu su tata ta eilo.

Bon comunicacion

Den tur tres pelicula e may- ornan ta acudi finalmente na e Tienda di Educacion,



yamando 161 y despues e conseho anda den un forma mas apropia. Segun Corine Linssen, coordinador di e fun- dacion, e situacionnan filma ta realistico. Y nan tambe ta scogi pa kibra cierto pensam- ente erroneo cu mayor tin ain- da. Por ehempel a scoge cu un mama ta haya droga cerca su yiu muhe, mustrand cu mucha muhe tambe ta uza droga y no solamente mucha homber, locual hopi mayor ainda ta kere.

E propaganda tambe tin un mensahe principal, esta cu un bon relacion entre mayor y yiu ta rekeri un bon co- municacion. Hopi problema entre yiu y mayor ta cuminsa of escala pa motibo di falta di comunicacion, specialmente ora e yiu ta drenta e fase di teenager, asina sra. Linssen ta splica. Kico ta 'bon comuni- cacion' ta algo cu mayor por siña cu ayudo di e Tienda, por medio di curso, charla of yama e telefon special.

Efecto te awor

Bon Dia Aruba ta puntra si despues di un aña y mey di existencia di Tienda di Edu-



cacion, por mira cierto efecto (positivo) caba cerca mayor y nan yiu. Sra. Linssen ta con- testa cu te cu 2014 nan a ricibi 400 yamada y mas o menos 1000 mayor a presenta den un of otro charla organisa sea a participa den curso. E fundacion tambe a haci un evaluacion bou di mayor y a ricibi comentario positivo. "Pero ta dificil pa midi efecto

y realmente constata si tur esaki a trece mehoracion. Pasobra ta trata di cambio di comportacion locual ta algo cu no ta bay asina facil y lihe. Sinembargo, mi ta convenci cu e ta yuda ora nos ta keda enfoca continuamente riba esaki."

Mayor divorcia

Bon Dia Aruba tambe a papia

cu diferente trahado social cu tabata presente durante e lansamento di e campaña nobo diabierna pasa. Un trahado di Departamento di Asunto Social ta bisa cu den e ultimo añanan por mira un cambio den casonan di famia problematico. E indicacion ta cu awor tin mas problema momento mayor ta divorcia, compara cu antes tabatin mas problema cu abuso sexual den famia. Den e campaña nobo di Tienda di Educacion e topico divorcio no ta haya atencion. Segun coordinador Linssen nan ta consciente di e problema aki y a cuminsa

traha riba charlanan specifico pa mayor divorcia. Si tur cos ta bay manera planea e fun- dacion ta spera cu na mei sea na juni por cuminsa cu nan. Pa evita 'discusion', e Tienda lo separa e tatanan y maman- an cu kier participa. Ambos ta haya e mesun informacion, tip y conseho, pero si den en- cuentronan separa, asina sra. Linssen ta finalisa. □